

Tramantrè, pr soa cautela,  
 Ai saria nen d' pi bon  
 Che fesse tute d' rasparela  
 Una grossa provision.  
 Che fesse, ecc.

## I Vedovi vecchi innamorati.

### CANZONE XXXIX.

A m' fa rie quand i penso  
 A sti vido annamorà,  
 Già tuit gris, e ch' a comenso  
 Esse fiap e sgangarà;  
 Già tuit gris, e ch' a comenso  
 Esse fiap e sgangarà.

Pur a veulo (ela pa drola!)  
 Compari da gilicat,  
 E fè i dru con tanta tola,  
 Com' a fan d' istà i galat;  
 E fè, ecc.

Tnie un poch da ment a core,  
 Atilà com' tanti spos,  
 A fè visita a le sgnore,  
 Aplicandse a fè i grassios.  
 A fè, ecc.

S' a son già goblù ant le spale,  
 Venta vedie sti bagai,  
 Pr le strà tut mal uguale,  
 Marcè drit com' tanti pai.  
 Pr le strà, ecc.

Pr la barba e l' ampodrura  
 L' an un' ora al di impiegà,  
 Pr podeje fè figura,  
 E curvi i difet dl' età.  
 Pr podeje, ecc.

Van cambiandse la camisa  
 Finna dontrè vote al di,  
 E vestisse d'roba armisa  
 Par ch' ai sia proibi.  
 E vestisse, ecc.

Cosi a fan pr guadagnesse  
 L' eui e 'l genio feminin,  
 E podeje prest cobiesse  
 Con quaich bel scarabotin.  
 E podeje, ecc.

E s' a stanto a guadagnaje,  
 A s' angigno d' impieghè  
 (Costa pur lo ch' veul costaje)  
 Quaich conchera o quaich conchè.  
 Costa, ecc.

Coust a trambla, e coul a rangota,  
 D' atri son pi moi ch' 'l brous;  
 E pur buchè sti vei balota,  
 Calorà com' tante cious.  
 E pur buchè, ecc.

Ai n' è pochi o gnun ch' a s' curo  
 D' una roba già arsètà;  
 Ma la maggior part procuro  
 D' atachesse al fior dl' età.  
 Ma la, ecc.

E s' a peulo nen spuntela  
 Con le ciance e compiment,  
 A s' agiuto d' importela  
 Con doteje grassament.  
 A s' agiuto, ecc.

Osserveje com' a viro  
 Pensieros e tuit distrat,  
 A fantastico, a deliro,  
 E l' amor ai fa andè mat.  
 A fantastico, ecc.

S' a fan tant d'acaparesse  
 Quaich gioijn ch' ai daga ant l' eui,  
 L' è da rie a vedie slambanesse,  
 E fonde an breu d' faseui.  
 L' è da rie, ecc.

E con coula soa metressa  
 Sti bavos fan i galan  
 Con un deuit, con un' adressa  
 Da garofo e tulipan.  
 Con un, ecc.

A tapinno a visitela  
 Dontrè vote almanch pr di,  
 I babao stan a covela,  
 Ch' a noirio i seu pa chi.  
 I babao, ecc.

S' un amis, o chi si sia,  
 Ai tocheis pa mach la man,  
 Cousti vei, pr gelosia,  
 Ai fan dlongh d' ojass da can.  
 Cousti, ecc.

Tramantrè ste lanne finne,  
 Ma pi mole d' un barbel,  
 Van disendie d' parolinne,  
 Ch' a son dosse pi ch' l' amel.  
 Van disendie, ecc.

A s' butran a feje d' gnogne,  
 Sent promesse e quaich present,  
 Ai fan tute ste pussiogne  
 Pr podeje otni l' intent.  
 Ai fan, ecc.

L' an la boja ch' ai tormenta  
 Neuit e di con tal vigor,  
 Ch' a j' sbogia la scorenta,  
 E la toss pr sot e dsor.  
 Ch' a j' sbogia, ecc.

Dla fatiga ai na va poca  
 Pr guari sti bei umor;  
 Van cogià ampò ant la fioca  
 Fin ch' ai passa coul calor.  
 Van cogià, ecc.

Sebastiano Bodino.

CANZONE XL.

Bastian Bodin,  
 Cugnà d' Martin,  
 Ch' a va tirand seira e matin  
 D' fusète dant le maje, *o bien*,  
 Ch' ai fan cuncè le braje,  
*Vous m'entenderez bien.*

A l' ha acquistà  
 La nobiltà  
 Ant l' ospidal dla carità,  
 Guardè che bel garofo, *o bien*,  
 Da tnilo sot un cofo.  
*Vous, etc.*

L' è stait trovà  
 Na matinà  
 Dnans a la porta del Curà  
 Ficà ant una cavagna, *o bien*,  
 Ambèrlifà ant la bagna.  
*Vous, etc.*

Brut com' la neuit,  
 E senza deuit,  
 A smia giust un babi cheuit,  
 E senza di busie, *o bien*,  
 L' ha un moro da fè rie.  
*Vous, etc.*